



UKUGUJWA KWESONTO LAMASUNDU EMINDENNI – 2020

Njengoba kulonyaka iBandla lingakwazi ukugubha imfihlakalo yoSindiso lwethu ngendlela ephelele emiphakathini yamapherishi ngenxa yobhubhane lwegciwane leCorona kanye nesivimbelo sikaHulumeni sokuthi kunganyakazwa ukuze kunqandeke ukusabalala kwaleligciwane, sifanele ukuthola indlela entsha yokugubha njengomphakathi wamaKristo kanjalo neminden i yamaKristo.

Ngezansi ngumbono wokugujwa kweSONTO LAMASUNDU eMindenni – Ukukhumbula Ukungena kweNkosi eJerusalem, ngaphambi kokuHlushwa, uKufa nokuVuka kwaYo. Uma kukhona umakhelwane onesizungu – mmeme nizokhuleka ndawonye.

Umgubho ungomhla ka 5 kuMbas (April) 2020.

Amalungiselelo:

Umndeni uqoka umholi noma uBaba noma uMama emndenini. Lungisa izincwadi, labo abazofunda, amasundu noma amagatsha ezihlahla, konke kube sekhaya eduze kwetafula elembozwe ngendwangu emhlophe okubekwe phezu kwalo: isiphambano, amakhandlela kanye neBhayibheli.

Okokuqala, Bonke bahlangana ngaphandle kwendlu – eduze nesango lokungena. Amalunga omndeni aphatha amagatsha amasundu noma ezinye izihihlahla ezandleni zavo. Ukuqaphela okukhethekile makwenziwe entsheni nasezinganeni okumele babambe iqhaza elibonakalayo kulomgubho, bedumisa iNkosi uJesu.

Bonke ababuthene baqala iculo:

Umholi uyaqala: NgeGama likaYise beneNdodana noMoya oCwebileyo

Bonke: Amen

Umholi: UJesu Kristo unguMsindisi womhlaba.

Bonke: Akabongwe uNkulunkulu.

Umholi: Malunga omndeni wethu athendekayo, sihlangene ndawonye ekhaya lomndeni wethu ukugubha iSonto lamaSundu, ngenxa yegciwane leCorona elithelela abantu abanangi ezweni lethu nasemhlaben – ukuzivikela thina uqobo nokukhulekela labo asebegula, labo ababanakekelayo, ukunqanda leligciwane emhlabeni. Lokhu kusinika ngokunjalo ithuba lokuba yiBandla elincane elibuthene ndawonye ngomkhuleko, silalele iZwi likaNkulunkulu bese kikhombisana uthando nokunakekelana.

Selokhu kwaqala iNkathi yokuHlawula kuze kube manje silungise izinhliziyo zethu ngokuzihlawulisa nangemisebenzi yesihawu. Namhlanje sibuthene ndawonye njengomndeni ukuhalalisa neBandla lonke isiqalo somgubho wemfihlakalo yephasika leNkosi, okungukuthi, ukuHlupheka nokuVuka kwaYo. Kwaba ngenhoso yokuzuza lemfihlakalo ukuthi Ingene emzini wakubo iJerusalem. Ngakho-ke, ngalo lonke ukholo nokuzinikela, asikhumbuleni ukungena kweNkosi emzini ngenhoso yoSindiso lwethu, silandele ezinyathelweni zaYo, kuze kuthi sesenziwe ngegrasiya laYo ukuba sihlanganyele esiphambanweni saYo, sibe nesabelo ngokunjalo ekuVukeni kwaYo nasempilweni yaYo.

Emuva kwalenkulomo yokwandulela noma efana nayo, umholi usho umkhuleko wokubusisa amasundu nabo bonke abakhona: (sebenzisa owesibili – ufanelisekile). Bonke baphakamisa kakhulu amasundu.

Umholi:

O, Nkulunkulu! Yandisa ukholo lwethu sonke thina esikhona lapha, esibeke ithemba lethu kuWe, bese ulalela ngomusa imikhuleko yalabo abakhala kuWe; kuthi thina esiphakamisa lamagatsha namhlanje ukwamukela uKristo ngokunqoba kwaKhe, sithelele wena izithelo ngemisebenzi emihle ezuzeka ngaYe. Ophila ebusa izikhathi ngezikhathi.

Bonke bacula iculo elifanele..... Isikhashana.

Manje omunye (hayi uMholi) womndeni ufunda iVangeli ngokuNgena kukaJesu eJerusalem.

EmZungezweni wamaSundu – iVangeli – Mathewu 21:1-11

Kufundwa encwadini yeVangeli njengoba ilotshwe nguMathewu.

.....
Nalo-ke iVangeli leNkosi

Manje, sekuqala umzungezo namasundu aphakanyisiwe kuyiwa lapho umndeni uzoqhube ka khona nemikhuleko yawo yeSonto lamaSundu.

Umholi:

Malunga omndeni wethu athendekayo, njengezixuku ezazihlokomela uJesu eJerusalem, masihambeni kanyekanye sinokuthokoza ezinhliziyweni zethu, sidumisa iNkosi noMsindisi wethu.

Omunye uqala iKhorasi.....kuqale umzungezo. Umholi, ephethe igatsha lesundu, uhola umzungezo.

Uma bonke sebefikile endlini (egumbini) okuzohlanganelwa kuyo, umholi usho umkhuleko olandelayo:

Umholi:

Nkulunkulu Baba wethu, siyakubonga ngokuthumela iNdodana yaKho uJesu Kristo nokusivulela indlela yezimpilo zethu ukuba zikhululeke ngokufa kukaJesu esiphambanweni. Siyakubonga ngalokho ukumelwe yilolusuku – ukuqala Kwesonto eliyiNgcwele, ukuqala kohambo oluqonde emandleni esiphambano, ukunqoba kokuVuka, kanye neqiniso elinothile lokuthi uJesu uyiNkosi yamaKhosi ngempela. Singatha umndeni wethu wonke ngoMoya waKho bese uvula izinhlizyo zethu ukuba zilalele iZwi laKho. Lokhu sikucela ngoKristo iNkosi yethu.

Manje bonke bahlala phansi balalele izifundo. Abafundi abaqokiwe baqala izifundo. Emuva kwaleso naleso sifundo kungaba khona isikhashana sokuzindla buthuli, bese kuba isifundo esilandelayo.

IsiFundu soku-1 Isaya 50:4-7

Isifundo sithathwe iNcwadini ka-Isaya umProfethe

.....
Nalo-ke iZwi leNkosi.

Bonke: Akabongwe uNkulunkulu

IsiHlabelelo sokuphendula – AmaHubo 22:8-9, 17-18, 19-20, 23-24

Isiphendulo: Nkulunkulu wami, Nkulunkulu wami, ungishiyeleni na?

IsiFundo sesi-2 KwabaseFilipi 2:6-11

.....
Nalo-ke iZwi leNkosi.

Bonke: Akabongwe uNkulunkulu

Ibika leVangeli – KwabaseFilipi 2:8-9

Indaba yokuHlupheka kukaJesu ifundwe uma kunokwenzeka njengoba idinga abafundi abathathu: 1. UMLandi; 2. uthatha amazwi ka 1 noma abantu abanangi abakhulumayo kuthi u3. amazwi kajesu.

IVangeli – Mathewu 26:14-27; 66

Emuva kwamazwi “UJesu waphinda wamemeza ngezwi elikhulu, wayesededela umphefumulo”, kuyaguqwa kuthulwe isikhashana.

Ngalesikhathi, wonk’umuntu angahlala phansi azinike isikhashana sokuzindla ngokuHlupheka kukaJesu. Bonke bangabelana: yimaphi amazwi owezwile athinte inhliziyu yakho, mhlawumbe athumele umyalezo kuwe, akucele ukuba uthathe isinyathelo. Umndeni wabelana ngemizwa yawo ngeZwi likaNkulunkulu elimenyezelwe kuwo.

**Uma sekuqedie ukuzindla, bonke bayasukuma bavume ukholo Iwabo besebenzisa
“UMvumkholo wabaPhostoli”**

Umholi ube eseqlisa IZINXUSO ZAMAKHOLWA:

UMHOLI:

Asikhulekeni ndawonye, njengomndeni ukuthi ngeleliSonto eliyiNgcwele siqoqe ngobuningi izithelo zokuhlupheka nokufa kukaJesu, kanjalo silungele ukwabelana enjabulweni yokuvuka kwaKhe:

Amanye amalunga omndeni:

1. Sikhulekela bonke abantu abasekulingweni Nkosi, ukuthi bakhumbule ukujuluka kwaKho igazi eGetsemane; sisize sonke ukunqoba isilingo ngomkhuleko. Nkosi silalele
Bonke: Nkosi lalela umkhuleko wethu, usithethelele izono zethu.
2. Siyakuthandaza Nkosi, wena owahlangabezana nobuhlungu kanye nesizungu ekuhluphekeni kwaKho, siletha kuWe bonke labo abezwa ibuhlungu ngenxa yegciwane leCorona, sikhulekela labo asebedlulile, bamukele eMbusweni waKho, qinisa uphe ithemba labo abanakekela abagulayo, yipha ososayense ubuhlakani bathole ikhambi, kuthi thina sonke siphile ekukhuselweni nasothandweni IwaKho. Nkosi silalele.
Bonke: Nkosi lalela umkhuleko wethu, usithethelele izono zethu.
3. Sikhulekela bonke labo abaphika ukuthi bake bakwazi wena njengoba kwenza uPetrus; basize kanye nathi sonke ukuba sibe ofakazi abathembekile bothando IwaKho kubo bonke abantu. Nkosi silalele.
Bonke: Nkosi lalela umkhuleko wethu, usithethelele izono zethu.
4. Sikhulekela labo abasolwa ngokungeyikho; benze bakhumbule ukuthi wena walahlwa kanjani uPilato kungafanele. Sisize sikubekezelele ukusolwa singonanga;

sisize ukuba singahluleli omakhelwane bethu; sibe nomusa ngaso sonke isikhathi ekwahluleleni kwethu. Nkosi silalele.

Bonke: Nkosi lalela umkhuleko wethu, usithethelele izono zethu.

5. Wathethelela ngobubele izono zesela elilungileyo wase ulithembisa izulu ngaso leso sikhathi; siza bonke abantu abawele esonweni ukuba bathembele ebubeleni nasekuthetheleleni kwaKho bese bebuyela kuWe ngeSakramente lokuBuyisana. Nkosi silalele.

Bonke: Nkosi lalela umkhuleko wethu, usithethelele izono zethu.

6. Sikhulekela bonke abantu abasha emhlabeni wonke, okumele namhlanje bagubhe Usuku Lomhlaba Lwabantu Abasha (World Youth Day) kanye noPhapha Francics eRome, kodwa ngenxa yegciwane abakwazi ukubuthana ndawonye bafakaze kuJesu; gcwalisa uPhapha Francis nabo bonke abaBhishobhi kanye nabaPriste ngoMoya oCwabileyo, impilo enhle kanye namandla okuhola iBandla ezikhathini zokuvivinywa. Nkosi silalele.

Bonke: Nkosi lalela umkhuleko wethu, usithethelele izono zethu.

7. Sikhulekela umndeni wethu kanye neminye imindeni endaweni yethu, ukuthi ngokuqinisa izipho zikaMoya oCwabileyo, sabelane nabo bonke omakhelwane bethu ngothando IwaKho, intethelelo, kanye nomusa bese sakha uMbuso kaNkulunkulu emphakathini wethu. Nkosi silalele.

Bonke: Nkosi lalela umkhuleko wethu, usithethelele izono zethu.

8. Manje noma ubani angasho izinxuso nokubonga kwakhe..... Nkosi silalele.

Bonke: Nkosi lalela umkhuleko wethu, usithethelele izono zethu.

Umholi:

Baba osezulwini, iNdodana yaKho ethandekayo uJesu yahlupheka yafa ukuze isisindise. Sisize sihlanganyele kanye naYo ekuhluphekeni kwempilo yethu yonke, sife kanye naYo nasebunganini baYo ekuvukeni kwaYo nasodumeni IwaYo kuWe. Lokhu sikucela ngoKristo iNkosi yethu.

Bonke: Amen.

Umholi:

Sizophetha umkhuleko wethu womndeni ngokusho ngesizotha umkhuleko esawufundiswa nguJesu, simthembisa ngendlela ekhethekile ukuthi sizobathethelela bonke labo abasonile noma ngayiphi indlela. Asishoni ngokunensa nangesizotha:

Baba wethu osezulwini...

Umkhuleko wokuvala:

Umholi:

Bheka, siyakucela Nkosi, lomndeni waKho, iNkosi yethu uJesu Kristo engangabazanga ukukhashelwa ezandleni zababi yaphinda yazinikela ebuhlungwini besiPhambano ngenxa yawo. Ophila ebusa izikhathi ngezikhathi.

Bonke: Amen

Bonke bakhuleka kanyekanye isibusiso sokugcina:

INkosi mayisibusise, isilondoloze kukho konke ukubi, isiyise ekuphileni kwaphakade. (*bashaya isiPhambano, baqhubeke*). Ngegama likaYise beneNdodana noMoya oCwabileyo. Amen.

**Makabongwe uNkulunkulu,
manje nanini nanini.**

